

Fan däi fisker un siin wiif



fan

Philipp Otto Runge

up Oostfräisk fertóólt fan

Oen Diirk Feldman

2. uplóóeg

©2024 Onno Dirk Feldmann

uutgeever:

Onno Dirk Feldmann

Rajenstr. 68

26810 Westoverledingen

drük:

epubli - 'n denst fan d' neopubli GmbH, Berlin

Biblioogóófsk inf'rmoósje fan d' Düütsk

Nóósjenóólbibtäik:

Däi Düütsk Nóósjenóólbibtäik ferbaukt disser
publikóósje; nibber biblioogróófsk dóóten bünt up 't
internet oover <http://dnb.d-nb.de> tau ferkriigen.

D'r was insett 'n fisker, däi woonde mit siin wiif tauhôop in 'n lütje pullenhütje bii d' säj. Däi fisker gung aldóóeġ nóó d' säj tau, um t' fiskern.

Doo häi insett bii d' säj t' aangeln sat un up 't boer wóóter keek, tjukde taumóól wat an siin äies un reet däi hóóek däip andóól. Un as häi siin fangst anhooġ truk, broch häi 'n grôot but fandaġ.

Däi but see teegen hum: "Ik beed dii, dat duu mii 't leeved letst! Ik bün ġiin ræecht but, ik bün 'n biihekst prins! Set mii weer in 't wóóter un lóót mii swemmen!"

"Süüsoo", see däi fisker, "duu bruukst näit groot wat säegen; 'n but däi prooten kan, wil 'k je wies weer swemmen lóóten."

Doo set'de häi däi but weer in 't wóóter un as disser fandöör swum, achterleet häi 'n bóón fan blaud in 't wóóter.

As däi dag d'r heer was, kwam däi fisker in huus un fertelde siin wiif, wat d'r geböört was. D'r fan, dat häi 'n but fangen haar, woo däi see dat häi 'n biihekst prins was un woo häi hum weer swemmen leet.





"Hest duu dii dan häil niks wünskert?" froog siin wiif.

"Nee!", see häi doo, "Wat sul ik mii dan wünskern?"

"Ach!", see siin wiif doo, "Dat is do mis! Altiid in 'n
óoserğ fuul pullenhütje woonen! Góó do insett tau un
wünsker us 'n lütjet huus!"

Däi fisker was 't näit häil recht, man häi gung weer nóó
d' säj tau. As häi bii 't öyver kwam was däi säj geel un
gröyn klöört. Doo gung häi an 't wóóter stóón un see:

"Mantje! Mantje! Timpke täj!

Butje! Butje in d' säj!

Miin wiif, däi Ilsbil,

wil näit soo as ik wal wil."



Doo kwam däi but answummen un see teegen däi fisker:
"Wat wil s' dan?"

"Ach!", see däi keerl doo, "Ik heb dii do fangen, düs
säegt miin wiif, ik haar mii wat wünskern sult. Säi ma᷑
näit meer in 't pullenhütje woonen un wil geern 'n lütjet
huus hebben."

"Góó man tau", see däi but, "säi sit't d'r al in."

Doo häi weer bii siin wiif kwam, stun dat in d' dööer fan
'n näej huus un see teegen hum: "Kum in! Nuu is 't do
fööl beeter mit us!"

As häi binnen kwam wassent d'r ruum nauğ kóómers;
f'rdañ 'n woonkóómer, 'n slóópkóómer un 'n kööken.

Achter 't huus was 'n lütje tûun mit allerlai gröyent un
loof un d'r teegen was no 'n lütjet hof mit wat hauner un
óonten.

Ach!", see däi fisker doo, "Nuu willent wii ferhöygt
leeven."

"Jóó!", see dat wiif, "Dat willent wii daun."



Soo gung dat ook 'n stük of färtain dóóeğ, man doo see
dat wiif:

"Keerl! Dat huus word't mii t' naau, däi tûun is t' lütjet
un dat hof t' min. Ik wil nuu in 'n stäinen slot woonen.
Góó nóó d' but tau; häi sal us 'n slot daun!"

"Ach wiif", see däi fisker doo, "däi but het us do net
akróót 'n huus dóón, ik mağ näit no insent koomen un
däi but nóóst no ferdräitelk móóken."

"Wat", see dat wiif, "häi kan 't fan rechtens gaud daun
un dee dat seeker geern! Góó nuu tau!"

Doo gung däi fisker tau, man sünner gâaud gewäiten. As
häi bii d' säj kwam was 't wóóter fan tsangen un dunker
blâau klööer, man däi wóógen wassent kalm. Doo gung
häi stóón un see:

"Mantje! Mantje! Timpke täj!

Butje! Butje in d' säj!

Miin wiif, däi Ilsbil,

wil näit soo as ik wal wil."

"Wat wil s' dan?", see däi but.

"Ach!", see däi fisker, mit 'n häiel biidrøyvt stäem, "Miin wiif wil in 'n stäinen slot woonen."

"Góó man tau, säi staajt d'r al fööer", see däi but.

Doo gung däi fisker tau un siin wiif stun fööer 'n grôot plaajs.

"Süü keerl!", see s', "Wat is 't nuu mooj!"



Mit nanner gungent s' d'r in. D'r wassent densten, däi müren wassent skier un gollen stauen un tóovels stunnent in d' sóól. Achter 't slot was 'n tûun un 'n holt, wal ruugweg 3000 faut lang.

Dat holt burg harten, räjen un hóósen un up 't hof gaf 't 'n kaustâal un 'n peerstâal.

"Ach!", see däi fisker, "Nuu willent wii ook in 't môoj slot bliiven un t'free weesen!"

"D'r willent wii no inset oover slóópen", see dat wiif un doo gungent s' up bär.

Up d' anner mörn, doo 't wiif wóóker wur, was 't al middag. Säi dubde höör keerl fut mit 't elbôog in d' siid un see: "Keerl! Anhoog! Nuu maotent wii köönenk oover âal dat land worden!"

"Ach wiif!", see däi fisker doo, "Woo wult duu köönenk woorden? Däi but kan 't seeker näit daun."

"Keerl!", see dat wiif, "Góó straks nóó d' but! Ik maut köönenk weesen!"



Doo gung däi fisker häil biidröyvt tau, um dat siin wiif köönenk worden wul. Un as häi bii d' säj kwam, was dat wóóter swaartklöört un wóógde up un dóól. Doo gung häi stóón un see:

"Mantje! Mantje! Timpke täj!

Butje! Butje in d' säj!

Miin wiif, däi Ilsbil,

wil näit soo as ik wal wil."



"Wat wil s' dan?", see däi but.

"Ach!", see däi fisker, "Miin wiif wil köönenk worden."

"Góó man tau, säi is 't al", see däi but.

Doo gung däi fisker tau un as häi bii d' plaajs kwam,
wassent d'r suldóóten mit trummen un keedeltrummen.
Siin wiif sat up 'n hôog troon fan gold un djóómanten.
Säi haar 'n grôot gollen krôon up d' kop un an elker
kâant sööm jüffers, elk 'n kop lütjerder as däi anner.



"Ach!", see däi fisker, "Büst duu nuu köönenk?"

"Jóó!", see s' doo, "Ik bün köönenk!"

Un as häi höör 'n setje ankeeken haar, see häi: "Ach wiif!
Wat let't dat mooj d'r fan of, dat duu nuu köönenk büst.
Düs wil ik ook niks meer wünskern."

"Nee keerl", see s' doo, "mii dürt 't âal t' lâang. Doo ik köönenk bün, wil 'k nuu ook kaiser worden!"

"Ach wiif!", see däi fisker doo, "Woosoo wult duu kaiser worden?"

"Keerl!", see s', "Góó nóó d' but tau, ik wil kaiser worden!"

"Ach wiif!", see däi fisker doo, "Kaiser, dat kan häi seeker näit. Ik maăg hum dat näit fróógen."

"Ik bün köönenk", see dat wiif doo, "un duu büst miin keerl, düs góó rad hen!"

Doo gung däi fisker tau un as häi soo leep doch häi bii sük: "Dat löpt teegen. Kaiser is tau fööl. Däi but word't up 't läest no dül up us."

Doo häi bii d' säj kwam, was dat wóóter gnidswaart un dik as ölje. 'T gung 'n buustert d'r oover weg, dat hum däi fingertippen kullent. Häil biinaaut gung häi stóón un see:

"Mantje! Mantje! Timpke täj!

Butje! Butje in d' säj!

Miin wiif, däi Iisbil,

wil näit soo as ik wal wil."

"Wat wil s' dan?", see däi but.

"Ach!", see häi doo, "Miin wiif wil kaiser worden."

"Góó man tau", see däi but, "Säi is 't al."



Doo gung däi fisker tau un as häi in 't slot kwam, sat siin
wiif up 'n no hoogerder troon, däi in 't gehäil fan gold
was. Up 't hoovd haar säi 'n krôon, däi was twei ellen
hooğ, un an elker kåant stunnent worders; âal tauhôop
in d' rîig, elk 'n endje lütjerder an däi d'r teegen. Fan 'n
grôot röoes bit tau 'n lütje keerlke hen, däi net akróót
soo groot as 'n lütje finger was. Fööer höör stunnent
gróofen, haartoogen un anner eedellüü.

Doo kwam däi fisker bii höör un froog: "Wiif! Büst duu nuu kaiser?"

"Jóó!", see 's doo, "Ik bün kaiser."

"Ach!", see däi fisker un keek höör recht lâang an, "Wiif wat is dat mooj, dat duu nuu kaiser büst!"

"Keerl!", see s' doo, "Wat staagst duu no dor! Ik bün nuu kaiser, nuu wil ik ook no paaus woorden!"

"Ach wiif!", see däi fisker, "Woo wult duu paaus worden? Paaus is man äits äien in d' häiel kristendaum!"

"Keerl!", see s' doo, "Ik maut fandóóeģ no paaus worden!"

"Nee wiif", see häi doo, "Tau d' paaus kan däi but dii näit móóken, dat gaajt noojt näit."

"Keerl, wat 'n kweedeln! Um dat häi kaisers móóken kan, kan häi ook paausen móóken. Góó nuu tau!"

Doo gung däi fisker tau, man hum was 't raajn biinaaut tau. Dat bänwaark trielde hum un up buuten gung däi wind d'r gaud t' keer, soo dat däi skóópen fan nood up un dóól röndent un däi bulgen as maal joogent un dansdent. In d' middent fan d' heemel was no wat lücht t' säin, man fan d' kanten look d'r 'n grôot unwêer up.

Doo kwam häi biinaaut un bâang t' stóón un see:

"Mantje! Mantje! Timpke täj!
Butje! Butje in d' säj!
Miin wiif, däi Ilsbil,
wil näit soo as ik wal wil."

"Wat wil s' dan?", see däi but.

"Ach!", see däi keerl, "Miin wiif wil paaus worden."

"Góó man tau", see däi but, "Säi is 't al."

Doo gung häi tau un doo häi in 't slot kwam, sat siin wiif
up 'n troon fan ruuğweğ 10.000 faut höeğt. Up 't hoovd
haar s' drei grôot kroonen un bii höör stunnent gaud wat
hilglüyü. Bii elker kåant stunnent lüchten, fan 'n gröet't as
'n toorn tau 'n lütje kêers was d'r als mit manken.

"Wiif!", see däi fisker un keek höör recht lâang an, "Büst
duu nuu paaus?"

"Jóó!", see s' doo, "Ik bün nuu paaus!"

"Ach!", see däi fisker, "Wat is dat mooj, dat duu nuu
paaus büst. Nuu wees t'free! Doo duu paaus büst, kaast
duu niks hoogers worden."

"D'r wil ik insett oover slóópen!", see dat wiif un gung up bärer.

Man säi was näit t'free un däi hebbergkaid leet höör näit slóópen. Säi wul no meer worden. Doo däi süen rees un säi tau 't fenster uut keek, doch säi: "Kan 'k näit ook däi süen riisen lóóten?"



Doo wur säi dül un stöt höör keerl in d' siid: "Keerl góó nóó d' but tau! Ik wil as däi läief God worden!"

Däi fisker was no häil duuselk, man häi ferfeerde sük soo fäel, dat häi tau 't bärer uut ful.

"Ach wiif", see häi, "biidenk 't un bliiv paaus!"

"Nee!", see dat wiif un reet sük dat liifstük köt, "Ik kan mii näit biidoren, doo ik däi süen un däi móón näit riisen lóóten kan! Ik maut as däi läief God worden!"

"Ach wiif!", see däi fisker doo, "Dat kan däi but noojt!
Kaisers un paausen kan häi móóken, man dat näit."

"Keerl!", see s' doo un leet d'r häil griiselk fan of, "Ik wil as däi läief God worden! Góó nóó d' but tau!"

Doo truk hum 'n skrikkelk bâangt döör d' leeden, dat häi
fan nood bloot soo trilde. Buuten gung d'r 'n rûug
stöörm t' keer, däi âal boomen uutreet un fandöör
waajen un swoer flinten as föögels döör d' lücht kaiern
leet. Doo saäg häi, woo däi säj bloot no eemer swâart un
hôoëg bulgen was as of sük 'n häel fan wóóter fööer hum
oopenboren dee. Häil bâang see häi:

"Mantje! Mantje! Timpke täj!

Butje! Butje in d' säj!

Miin wiif, däi Ilsbil,

wil näit soo as ik wal wil."



"Wat wil s' dan?", see däi but.

"Ach!", see häi, "Säi wil as d' läief God worden."

Doo see däi but: "Góó man tau, säi sit't al weer in 't
pullenhütje!"



Un dor sittent s' fandóóeġ no.